



Kristian Jeremiassen, Siumut
-/ Maani

Qeqertarsuup Tunuani timmisartuussineq pillugu § 37 naapertorlugu apeqquteqaammut akissuteqaat

29-01-2013

Sags nr. 2013-079286

Dok. nr. 1124380

Asasara Kristian Jeremiassen

Postboks 909

3900 Nuuk

Qeqertarsuup Tunuani qulimiguulimmik timmisartuussineq pillugu apeqquteqaatinnut
qujanaq. Apeqqutitit tullerriaarlugit akineqassapput.

Tlf. (+299) 34 50 00

Fax (+299) 34 54 10

E-mail: iaan@nanoq.gl

www.nanoq.gl

Angallanermut akisussaasutut kiffartuunneqarnissamik isumaqatigiissutit
sivitsorneqarnerinut tamakkiisumik tapersersuivunga. Aamma innuttaasut sulii
angallasseriaatsimik ingerlalluatumik peqartut isumaqarpunga. Kisiannili aamma ulluni
makkunani kiffartuunneqarnissamik isumaqatigiissutit politikikkut
isornartorsiorneqartillugit, tunngavissat pingaarutillit marluk puigorneqartartut
isumaqarpunga:

1. Angallasseriaaseq Naalakkersuisut aamma Inatsisartut Aningaasaqarnermut
Akileraartarnermullu Ataatsimiititaliaata akornanni ataatsimut
aaqqiigallarneruvoq
2. Pitsannguisoqassappat aningaasat amerlanerusut pisariaqartinneqarput

Taamaattumik aallarniutigalugu immikkoortut taakku itisiliiffigerusuppakka.

Angallasseriaaseq Naalakkersuisut aamma Inatsisartut Aningaasaqarnermut Akileraartarnermullu Ataatsimiititaliaata akornanni ataatsimut aaqqiigallarneruvoq

2012-imi upernaakkut neqerooruteqartitsineq tunngavigalugu kiffartuunneqarnissamik
isumaqatigiissutit arlallit naammassineqarnissaat Naalakkersuisut kissaatigaat.
Naalakkersuisut naliliinerat malillugu kiffartuunneqarnissamik isumaqatigiissusiornikkut
innuttaasut attaveqaatinik pitsaanerusunik qulakkeriffiqineqassapput. Kisiannili
Naalakkersuisut kiffartuunneqarnissamut isumaqatigiissutinut taakkununga
isumaqatigiissuteqarnissamut piginnaatinneqarnissaat Aningaasaqarnermut
Akileraartarnermullu Ataatsimiititaliamit kissaatigineqanngilaq. Taamaattumik
angallasseriaaseq maannakkut atorneqartoq Naalakkersuisut aamma
Aningaasaqarnermut Akileraartarnermullu Ataatsimiititaliap akornanni aaqqiigallarnerup
inerneraa.

Pitsannguisoqassappat aningaasat amerlanerusut pisariaqartinneqarput

2006-imi taamanikkut Naalakkersuisuusut aalajangerput, aningaasat
kiffartuunneqarnissamik isumaqatigiissutinut akiliutigineqartartut ataatsimut katillugit

pingajorarterutaat suliassa qarfinnut allanut, taakkunungalu ilanngullugu ilinniartitaanermut nuunneqassasut. Tamatuma kingorna suliassa qarfimmu aningaasaliissutaasartut ilaneqarsimanngillat, aammalu aningaasanut inatsisissanik isumaqatiginninniarnernut atatillugu aningaasat ilaneqarnissaannik siunnersuuteqartoqartarsimanngilaq.

Angallannermut anngaasat amerlanerusut atorneqassappata, aningaasanik suliassa qarfinnit allanit tigusisoqartariaqarpoq. Taamaattumik ataatsimut nalilersuinissaq pisariaqarpoq. Aammalu ukiut kingulliit qulit ingerlanerini Kalaallit Nunaanni suliassa qarfiit allat, soorlu ilinniartitaanerup salliutinneqarnissaat sulissutigineqartarsimavoq. Taamatut salliutitsineq aningaasaliissutinut malunniuttariaqarpoq ersiuteqartussaallunilu – taamaanngippammi oqaatsit atorneqartut imaqarsimassanngillat. 2011-imi ukiaanerani ataatsimiinnermi 2012-imut aningaasanut inatsisissatut siunnersuutip saqqummiunneqarneranut atatillugu annertunerusumik aningaasaliisoqarnissaannik kissaateqartoqanngilaq.

1. Qulimiguullip Bell 212-ip qeqertarsuup tunuani ilaasunik angallassissutinngortup allamik taarserneqarnissaa qaqugu naatsorsuutigissavara?

Kiffartuunneqarnissamik isumaqatigiissutit atuuttut 2014-ip naanissaanut sivitsorneqarput, aammalu piffissami tassani Qeqertarsuup Tunuani suliassat isumagineqarnerinut qulimiguullit Bell-212-it atorneqarnissaat Air Greenland A/S-imit (matuma kingorna Air Greenland) naatsorsuutigineqarpoq.

Kisiannili qulimiguullip, novembarip qiteqqunneraniit februaarip naaneranut kaperlannerani atorneqartussap IFR-inik atortoqarnissaa qulakkeerniarneqarpoq. Tassalu qulimiguulik atortut atorlugit timmisartorsinnaanissamut akuerisaassaaq, taamaalillunilu taartumi timmisartuussisinnaassalluni.

Tamatuma saniatigut Air Greenland aalajangerpoq, qulimiguulimmik minnerusumik AS350-imit timmisartuliinarluni, taamaalilluni Aasianni nunaqarfinnut timmisartuussisarnermi qulimiguulik Bell-212 Ilulissaniittoq isumalluutiginagu ingerlatsisoqarsinnaassalluni.

Taamaattumik qulimiguullip Bell-212-ip allamik taarserneqarnissaanut maannakkorpiaq pilersaaruteqartoqanngilaq.

Aammattaaq ilisimatitsissutigineqarsinnaavoq, Bell-212 qulimiguulinnik allanik anginerusunik taarserneqassagaluarpat tamanna 100 mio. koruuninik arlalinnik akeqartussaammat. Tamatumani kiffartuunneqarnissamut isumaqatigiissutinut immaqa sivisoorujussuarmik atuuttussanut aningaasaliissutit annertoorujussuarmik qaffanneqarnissaat pisariaqartussaavoq.

Qulimiguullit S-61-it 2012-ip naanerani atorunnaarniarlugit Air Greenland-ip 2009-imi nalunaarutigigaluaraa, nuna tamakkerlugu qulimiguulinnik anginerusunik pisinissaq siunertaralugu politikkikkut partiit arlaannaannilluunniit aningaasaliissutit amerlineqarnissaannik kissaateqartoqanngilaq.

2. Qeqertarsuup tunuani 1. januar 2013 aallarnerfigalugu ilaasunik angallassineq eqqarsaatigalugu ajorseriaateqarpat suut pitsannngorsaatissatut eqqarsaatigineqarpat?

Allaffeqarfinnit apeqqutip akineqarnissaanut atatillugu Air Greenland attaveqarfigineqarpoq, tassanngaanniillu januaarip ulluisa aallaqqaataanniit 15-ianut piffissaq eqqorlugu tikittarnermi siorna ukiup taamaalineranut sanilliussat uku ilisimatitsissutigineqarput:

Ukioq	Piff. eqqorlugu	0-15 minutsinik kinguaattoornerit	16-30 minutsinik kinguaattoornerit	31 minutsiniit nal. ak. 12-inik kinguaattoornerit	Katillugit
2012	39 %	17 %	17 %	27 %	99 %
2013	52 %	12 %	4 %	30 %	98 %

Najoqqutarisaq: Air Greenland

Takussutissiami matuma siulianiittumi takuneqarsinnaasutut, qulimiguullit piffissaq eqqorlugu aallartartut 2012-imi piffissamut tassunga sanilliullugu 2013-imi amerlanerusimapput.

Timmisartuusseriaatsip atulerneraniit sapaatit akunneri ikittuinnaat ingerlareersimammata, siunissami ungasinnerusumi piffissaq eqqorlugu aallartartut qanoq isikkoqassanersut nalilissallugu sulisiusippallaarpoq. Pisut soorunami qanittumik malinnaaffigissavakka.

Qulimiguulimmik kinguaattoortoqaraangat tamatigut innuttaasunut eqqugaasunut tamanna kipiluttunartarmat paasisinnaavara. Kisiannili soorunami assartuussinerit tamarmik piffissaq eqqorlugu ingerlanissaat anguniarneqartariaqarpoq, kisiannili tamatigut teknikkikkut ajornartorsiortoqalersinnaasarpog imaluunniit piffissap ilaani sila ajorsinnaalluni.

Kisiannili apeqqut 1-imut akissummi takuneqarsinnaasutut Air Greenlandip ajornartorsiut qaangerniarlugu qulimiguulik, taartumi timmisinnaasoq misilillugu atorpa, aammalu Aasianni nunaqarfinnut timmisartuussisarneq qulakkeerniarlugu qulimiguulik AS-350 atuuttussannngortikkallarlugu.

3. Allakkat Qasigiannnguanukartut 1. januar 2013-imiit sukkanerusumik ingerlanneqartalernissaat qulakkeerniarlugu qanoq iliuseqartoqarpa?

Namminersorlutik Oqartussanit nuna tamakkerlugu pilersuinerup qularnaassusia ataatsimoortillugu eqqumaffigineqartorujussuuvoq, tassungalu innuttaasut allagarsinnaanerit ilaavoq.

Taamaattumik kiffartuunneqarnissamik isumaqatigiissutini piumasagaatitut allanneqarpoq, sullissisut allakkat salliutillugit, aammalu poortukkat pingarnerit pingajuattut inissillugit nassartassagaat, tassalu allakkanik nassiussisarneq assersuutigalugu inunnik assartuussinnermit pingaarnerutinneqarpoq.

Angallassinermut pilersaarummi nutaami sapaatit akunnerisa ulluini siullerni tallimani Qasigianguit aamma Ilulissat Aasiaallu akornanni ullormoortumik angallassisarnissaq ilaatinneqarpoq, tassalu siornatigut angallasserit sapaatit akunnerinut marluusarput. Tamanna allakkat apuunneqarnissaannut periarfissanik amerlititsisussaavoq.

4. Sapernguneq pequtaalluni timmisartut qulimiguullilu uniinnartarnerannik kinguneqartumik unnuisarfinnik atuisarnermi aningaasartuutit amerleriarnissaat naatsorsuutigineqarsimava?

Qulimiguullimmut Bell-212-imut nuunneq Nunap Karsiata imaluunniit innuttaasut unnuisarnermut aningaasartuutaannik amerlititsisasoq Naalakkersuisunit naatsorsuutigineqanngilaq.

Kiffartuunneqarnissamik isumaqatigiissutinut akiliutissat kiffartuunneqarnissamik isumaqatigiissutini aalajangersarneqarsimapput. Aningaasani taakkunani piffissamik eqquinginermit atatillugu aningaasartuutit ilaatinneqarput. Taamaattumik piffissap ilaani, soorlu silap ajornera imaluunniit teknikkikkut ajornartorsiuteqarneq pissutigalugu taamaatitsinerit amerlanerulissappata, Namminersorlutik Oqartussat amerlanerusunik aningaasartuuteqassanngillat.

Innuttaasunut eqqorneqartussanut tunngatillugu pisut ilaanni taakku sillimasiissummit, Namminersorlutik Oqartussat Air Greenlandimut isumaqatigiissutigisimasaannit matussusiivigineqartussaapput.

Kisiannili angalaneq nunaqarfimmiit pisimappat, ilaasorlu piffissami kinguaattoorfiusumi takkunnerminik nalunaarsimappat, Air Greenlandip inissiinissani pisussaaffiginngilaa. Nunaqarfiit amerlanerpaartaanni Air Greenlandip inissiiffiginnaasaanik akunnittarfeqannginnera assigisaanilluunniit peqannginnera tamatumunnga pissutaavoq. Taamaattumik sillimasiissut taamaallaat sumiiffinnut, pisortatigoortumik inissiinissamut periarfissaqarfiusunut atuuppoq.

Isumaqatigiissut atsiorneqarmat, amerlanerpaat matussusiiffigineqarsinnaasut nalliisoqarpoq: Ilaasut nunaqarfimmiit angalasut namminneerlutik nunaqarfimmi najugaqartuusarput, imaluunniit ilaqtaminnut ikinngutiminnulluunniit tikeraarsimasuusarlutik. Taamaattumik qulimiguullip angalaqqinnissaata tungaanut annertunerusumik aningaasartuuteqaratik inissinneqarsinnaapput.

Neriuppunga matuma siuliani apeqqutitit akisimassallugit.

Inussiarnersumik inuulluaqqusillunga

Jens B. Frederiksen